


# TEZAU LITURGIC

**6 IUNIE**

## **SLUJBA SF. MUCENIȚE ARHELAIA, TECLA ȘI SUZANA DE LA SALERNO ITALIEI**



**MOSCOVA, 2000**



# СЛУЖБА

## святым преподобномученицам девам Архелает, Фекле и Сосанне

### НА ВЕЧЕРНИ

На Господи, воззвах: **стихиры, глас 4:**

Троицу мучениц, вернии, днесь в песнях  
священных похвалим, / яко лествицею  
низложиша, / многобожия огнь испепелиша и  
демоны посрамиша; / мучителей же ярости не  
устрашишася, / меча убо и плоти терзаний не  
убояшася, / доблественно подвизавшеся добре,  
/ Архелая, Фекла и Сосанна славныя, //  
явльшеся мучеников слава, купно и похвала.

Девства добротой просияли есте, / и  
мученичества венцем украсилися есте, / в  
мужество женство добродетельми преложивши  
любвию Христовою, / Архелает, Фекло и  
Сосанно всечестныя, / о нас Христа Бога  
молите, // даровати нам мир и велию милость.

Божия жилища были есте, / страстей бо мрак  
пощением умаливши, / мученически показались  
есте во страданиях славныя, / девы  
достоблаженныя и Богомудрыя, / о Церкви, о  
мире Христа молите, // даровати нам мир и  
велию милость.

**Слава, глас тойже:**

**В**ашу достославную память совершающе, /  
любовию почитающи вас, девы преподобныя,  
поем Христа, / вас ради подающего крепость  
исцелений, // Ему же всегда молитесь о всех  
нас.

**И ныне, Богородичен, глас тойже:**

**Е**дина истинная христиан Покровительнице, /  
Деве Марие Богородице, / всяких лютых  
обстояний, / бед и скорбей и болезней нас  
избави // и молитвами Твоими спаси души  
наша.

**На стиховне стихиры Октоиха.**

**Слава, святых, глас 2:**

**З**а Троицу терпеливно страдальчествовавшия, /  
многокозненнаго врага победисте, / трие девы  
честныя, / Архелае, Фекло и Сосанно; / темже  
водвористесь в Небесном, страстотерпицы,  
чертозе, / и со Ангелы Всецарю в веселии  
непрестанно предстоите / о нас моляще  
Владыку Христа, // во еже спасти души наши.

**Тропарь, глас 4:**

**М**ечем скончаваемы, девы преподобныя, /  
посекоште идольское неистовство / и, свещу  
неугасшу душевную соблюдше, / внидоште со  
Христом в Небесный чертог, / чудесными же  
искрами страсти пожгоште, / страстоносицы

честныя Архелае, Фекло и Сосанно, / демонов  
же полки страдальчески победисте / и ныне  
Христу Спасу молитесь, // во еже спастися  
душам нашим.

## НА УТРЕНИ

Канон, глас 2.

### Песнь 1

**Ирмос:** Грядите, людие, / поим песнь Христу  
Богу, / раздельшему море, / и наставляшему  
люди, яже изведе из работы египетския, // яко  
прославися.

**П**лотскою немощию сильного врага низложиште  
и присвоистесь к Богу, преподобныя жены,  
молящися, силу нам всем подати спасительну.

**К**репко на противного подвизаетесь, мученцы,  
пощением первее, таже второе кровными  
страданиями: сего ради вашу память верою  
почитаем.

**У**язвившися желанием претерпевшаго нас ради  
Крест и смерть, сего стопам последоваша,  
преподобныя мученцы, плотскую немощь  
забывше.

**Богородичен:** Укрепившися благодатию  
Воссиявшаго, Пренепорочная, из ложесн твоих,  
девы отроковицы приразишася к болезнем



мучения, и приведошася во след тебе  
радуешься.

### Песнь 3

**Ирмос:** На камени мя веры утвердив, /  
разширил еси уста моя на враги моя. /  
Возвесели бо ся дух мой, внемга пети: / несть  
свят, якоже Бог наш, // и несть праведен паче  
Тебе, Господи.

Силою крепкою от Бога укрепляеми, противнаго  
борца попраша силу: и сего ради яко  
победоносицы непобедимии прославишася.

Явишася зверина зияния бездельна,  
Божественною силою Христовою: и избавлены  
бысте Богомудрии девы невреждены, Бога  
прославляюще.

Мудростию и благодатию просвещься ум ваш,  
мучителей прещения не устрашитесь,  
страстотерпицы Спасовы, Архелае, Фекло и  
Сосанно, Божию силою укрепляеми.

**Богородичен:** Разумевше благоверно,  
проповедаем тебе истинную Божию Матерь  
Всенепорочную: Тобою бо с нами Зиждитель  
совокупитися изволи.

### Седален, глас 1:

Чудес вас источники стяжавше, почерпаем  
здравие обильно, мученцы прехвальнии, поюще

болезни ваша, и ревность Божественную, и  
язвы доблественныя и подвиги: и совершаем  
вашу досточудную память в славу Бога нашего.

**Слава, и ныне, Богородичен:**

**М**олитвы Твоих раб прими, Богородице, и  
избави нас от всякия беды: яко родила еси  
Христа Спаса, Избавителя душ наших.

**Песнь 4**

**Ирмос:** Пришел еси от Девы, / не ходатай, ни  
Ангел, / но Сам, Господи, воплощся, / и спас  
еси всего мя человека. / Тем зову Ти: // слава  
силе Твоей, Господи.

**Д**оброту пречистую любимого Жениха своего  
видят преподобныя жены, увядивше плотскую  
красоту воздержанием.

**С**ветлое ваше празднество, Архелает славная,  
Фекло всечестная и Сосанна чудная, светом  
Божия Духа сияющее, озаряет души наша,  
верою чтущих вас, преподобныя.

**М**учениц блаженных подвигу удивишася  
Небесныя силы, како врага победиша в женском  
естестве, укрепляеми силою от Девы  
Воссиявшего.

**Богородичен:** Воплотившагося Тебе, Господи, от  
Пречистой Девы, преподобныя возлюбивше, в  
волю мира Твоего потекоша, твоею уязвившася  
Божественною любовью.

## Песнь 5

**Ирмос:** Света подателю и веков Творче, Господи,  
/ во свете Твоих повелений настави нас; //  
разве бо Тебе иного бога не знаем.

Отвергше мирскую всю суету, Богу единому  
всею душою прилепистесь. Темже постнические  
труды и мучения претерпесте, невесты  
Христовы терпеливыя.

Яко агницы непорочныя и яко жертвы  
приятныя, Христу истинному пастырю  
принесостесь, приношения совершена, и  
приятна всесожжения.

Умертвившеся телом, ожисте душою,  
умертвившему крепость смертную, Крест, и  
смерть, и страсть вольную претерпевшему  
Христу, девы мученицы, подобящесь.

**Богородичен:** Воздвигни мя падшаго в ров  
страстей, и управимя яже Бога и правителя  
рождшая, едина Всенепорочная, совокупившаго  
благодатию разстоящихся первее.

## Песнь 6

**Ирмос:** В бездне греховней валяясь, /  
неизследную милосердия Твоего / призываю  
бездну: // от тли, Боже, мя возведи.

Недуги решаще вся силою Святаго Духа,  
отгоните болезненный мрак зарями  
преславными чудес ваших, и к великому свету



Небеснаго Царствия верных наставляете,  
всечестныя.

Умертвившеся мируи, наследовасте жизнь  
безсмертную: и чертога Божественнаго  
сподобистеся, богоблаженныя, светильницы  
ваша постническим елеем неугасимы соблюдше,  
всечестныя.

О маловременней и тлеющей небрегше жизни,  
сущим на земли оставльше сию, связасться  
любвию духовною, Архелае, Фекло и Сосанно  
блаженныя, темже ныне водворяетесь, идеже  
праведных селения.

**Богородичен:** Предстательницу тя живота вем, и  
хранительницу тверду, Дево, и напастей решащу  
молвы, и налоги бесов отгоняюще: и молюся  
всегда, от тли страстей моих избавити мя.

### Кондак, глас 6:

Страстотерпиц Христовых память празднуим, /  
и верою просяще помощи, / избавитися всем от  
всякия скорби, зовуще: / Бог наш с нами, //  
иже сих прославивый, якоже изволи.

### Икос:

Чудес вас источники стяжавше, почерпаем  
здравие обильно, мученцы Христовы Архелае,  
Фекло и Сосанно, почитающе болезни ваша, и  
ревность Божественную, и язвы доблественныя

и подвиги, и совершаем вашу досточудную память, зовуще: Бог наш с нами, иже сих прославивый, якоже изволи.

## Песнь 7

**Ирмос:** Телу златому премудрыя дети не послужиша, / и в пламень сами поидоша, / и боги их обругаша, / среди пламене возопиша, и ороси я Ангел: // услышася уже уст ваших молитва.

**Е**дин имуще разум в телесех мнозех, различными ранами стружеми, единого всех Господа Иисуса исповедаху, Богомудрии.

**И**муще очи сердечныя, ко спасающему Богу же и Царю, агницы Христовы внидоша ко всяческому злокозненному полку, и победиша мужески, вопиюще: благословен Бог отец наших.

**В**се желание стяжавше, мученицы, ко единому Владыце, житейския красоты яко сон вменисте, вопиюще: благословен Бог отец наших.

**Д**а не уныем, се отверзся чертог, но паче станем мужески: Христос бо венцы простирает, и телес своих не пощадим, вопияху доблिया мученицы на судищи.

**Богородичен:** Благословен плод Благословенного чрева Твоего, Чистая: егоже благословят Небесныя силы и человечестии собори,

избавляша нас от первыя клятвы,  
Благословенная.

## Песнь 8

**Ирмос:** Пещь иногда огненная в Вавилоне  
действия разделяше, / Божиим велением халдеи  
опалаящая, / верныя же орошающая, поющая:  
// благословите, вся дела Господня, Господа.

**В**о светлыя одежды себе кровию мучения  
одеясте, совлекшеся воистинну истлевшаго  
грехи человека, воспевающе: Господа пойте,  
дела, и превозносите Его во веки.

**Б**огатаго света светолитии, солнца мысленнаго  
Божественными светлостьми, мученцы  
прехвальнии Архелае, Фекло и Сосанно, ночь  
преидосте безбожия, поюще во единстве души:  
Господа воспевайте, дела, и превозносите Его во  
веки.

**Я**ко агницы, и яко нескверныя юницы, яко  
Божия голубицы, яко самовольныя жертвы,  
принесостеся, мученцы, Зиждителю, яко жертва  
непорочная, согласно поюще: Господа пойте,  
дела, и превозносите Его во веки.

**Богородичен:** Во след Тебе текоша жены  
страстотерпицы, мира благоуханнаго желающе,  
Пречистая Богоневесто, едина Неискусобрачная,  
Воссиявшаго из чрева Твоего, единогочаднаго

Твоего Сына, и с Тобою царствуют, воистинну песнословяще Христа во веки.

## Песнь 9

**Ирмос:** Безначальна Родителя Сын, Бог и Господь, / воплощься от Девы нам явися, / омраченная просветити, / собрати расточенная: // тем всепетую Богородицу величаем.

Устранившие себе житейских сластей, терпением болезней постнических, на землю сошедшаго нас ради Спаса и Господа, девы честныя Архелаете, Фекло и Сосанно, сего ради стяжасте на Небесех нетленный венец.

Подают исцеления требующим капли кровей ваших, яко от источника, преславныя мученцы, утоляют страсти болезненныя, и бесов прогоняют полки: сердца же Боголюбивых напояют на благоплодие Божиих дел.

Память вашу, страсотерпицы и девы Богомудрыя, Архелаете, Фекло и Сосанно, Божественными сияючи световидными благодатями, помышление просвещает похваляющих вас.

**Богородичен:** Премудрости селение, паче ума лучши показалася еси, Дево непорочная, одушевлен же Престол и дверь: темже яко Царицу ты жены возлюбиша, девы во след Тебе приведошася.

## Светилен, глас 2:

Совершающих любовью молебную вашу память, преподобнии и всечестнии мученицы, к Богу Избавителю молитвами вашими от всяких бед спасите: и мне душевную скверну, мало вас воспевшаго, омыйте.

## Слава, и ныне, Богородичен:

Света Превечнаго родила еси нам, Христа, Бога нашего, Пречистая Дево, избавльшаго весь мир от лести диавола. Темже молим Тя: не престай молящи, да подаст нам просвещение и велию милость.

Служба святым преподобномученицам девам Архелает, Фекле и Сосанне Салернским (†293) составлена клириком Одесской епархии Украинской Православной Церкви **протоиереем Илией Тетерьюко**. Последование публикуется по авторской машинописи, цензурными инстанциями текст не рассматривался.



